

**BOSNA I HERCEGOVINE  
FEDERACIJA BOSNE I HERCEGOVINE  
VLADA**

**NACRT**

**ZAKONA  
O IZMJENAMA I DOPUNAMA ZAKONA O PRIVREDNIM DRUŠTVIMA**

**Sarajevo, maj 2018. godine**

**ZAKON  
O IZMJENAMA I DOPUNAMA ZAKONA O PRIVREDNIM DRUŠTVIMA**

**Član 1.**

U Zakonu o privrednim društvima ("Službene novine Federacije BiH", broj 81/15) član 6. mijenja se i glasi :

„Član 6.  
(Djelatnost)

- (1) Društvo počinje obavljati svoju djelatnost nakon upisa u registar društava.
- (2) Društvo izjavom, u postupku registracije, potvrđuje ispunjenost uvjeta za obavljanje djelatnosti.
- (3) Nadležni registarski organ izjavu iz stava (2) ovog člana, po službenoj dužnosti, dostavlja nadležnim općinskim i kantonalnim organima i obavještava ih o početku obavljanja djelatnosti.
- (4) Nadležni inspekcijski organi, u postupku redovnog inspekcijskog nadzora, provjeravaju ispunjenost uvjeta iz stava (2) ovog člana.
- (5) Djelatnosti za koje je zakonom utvrđeno da se mogu obavljati samo na osnovu saglasnosti, dozvole ili drugog akta nadležnog organa, mogu se obavljati tek nakon dobijanja dozvole, saglasnosti ili drugog akta nadležnog organa.
- (6) Djelatnosti za koje je posebnim zakonom propisano da se obavljaju u određenom obliku privrednog društva, ne mogu se obavljati u drugom obliku privrednog društva.“

**Član 2.**

Član 60. mijenja se i glasi:

„Član 60.  
(Registar društava)

- (1) Podaci o društvu utvrđeni ovim zakonom upisuju se u registar društava.
- (2) Registar društava obuhvata registar podataka i registar isprava.
- (3) Nadležni registarski sud dužan je uredno i ažurno čuvati i voditi glavnu knjigu registra i zbirku isprava, kao i osigurati odgovarajuće uvjete za čuvanje tih knjiga.
- (4) Elektronski registar vodi Federalno ministarstvo pravde.
- (5) Upis u registar društva i objavljivanje registracije vrši se u skladu sa Zakonom o registraciji poslovnih subjekata u Federaciji Bosne i Hercegovine.
- (6) Promjene podataka i isprava društva, upisuju se u registar.“

**Član 3.**

U članu 304. stav (1) mijenja se i glasi:

„(1) Društvo sa ograničenom odgovornošću osniva se ugovorom koji zaključuju osnivači, čiji potpisi se ovjeravaju u skladu sa Zakonom o registraciji poslovnih

subjekata u Federaciji Bosne i Hercegovine i propisima kojim se u Federaciji uređuje elektronski potpis i elektronski dokumentat.“

#### **Član 4.**

U članu 305. iza riječi „zakonom“ dodaju riječi: „o registraciji poslovnih subjekata u Federaciji Bosne i Hercegovine i propisima kojim se u Federaciji uređuje elektronski potpis i elektronski dokumentat.“

#### **Član 5.**

U članu 347. stav (2) mijenja se i glasi:

„(2) Promjena osnovnog kapitala prijavljuje se nadležnom registarskom organu najkasnije sedam dana od dana donošenja odluke iz stava (1) ovog člana.“

#### **Član 6.**

Iza člana 372. dodaje se novi član 372a. koji glasi:

„Član 372a.  
(Započeti postupci)

Prijave podnesene prije stupanja na snagu ovog zakona koje se odnose na osnivanje ili promjene osnivača, dioničara i člana društva, isključenje člana društva, kao i prijave postupka izbora organa i donošenja opštih akata društava i drugih oblika organizovanja za obavljanje privredne djelatnosti, okončat će se po odredbama propisa koji su bili na snazi u vrijeme podnošenja tih prijava registru. “

#### **Član 7.**

(Stupanje na snagu)

Ovaj zakon stupa na snagu narednog dana od dana objavljivanja u „Službenim novinama Federacije BiH“.

# **OBRAZLOŽENJE UZ NACRT ZAKONA O IZMJENAMA I DOPUNAMA ZAKONA O PRIVREDNIM DRUŠTVIMA**

## **I – USTAVNI OSNOV**

Ustavni osnov za donošenje ovog zakona sadržan je u odredbi člana III. 1. tačka b.), koja je izmjenjena amandmanima VIII, LXXXIX i CVI i članu IV. A. 20. (1) d) Ustava Federacije Bosne i Hercegovine prema kojoj je u isključivoj nadležnosti Federacije Bosne i Hercegovine utvrđivanje ekonomske politike, a Parlament Federacije Bosne i Hercegovine, uz ostala ovlaštenja predviđena Ustavom Federacije Bosne i Hercegovine, odgovoran je za donošenje zakona o vršenju dužnosti federalne vlasti.

## **II – RAZLOZI ZA DONOŠENJE ZAKONA**

Zakon o privrednim društvima („Službene novine Federacije BiH“, broj 81/15) usvojen je kao strateški prioritet u svrhu jačanja privrednog razvoja, domaćeg tržišta i uklanjanju administrativnih barijera u poslovanju. Usvajanjem ovog zakona poduzete su snažne mjere na smanjenju opterećenja privrednim subjektima, te je kreiran okvir za primjenu novih standarda korporativnog upravljanja i njihovo praćenje.

Usvajanjem Reformske agende od strane Vlade Federacije Bosne i Hercegovine, identificirane su dalje aktivnosti usmjerene ka nastavku usklađivanja poslovnog okruženja i jačanju jedinstvenog ekonomskog prostora u Bosni i Hercegovini. U svrhu ostvarenja cilja iz Akcionog plana za provođenje Reformske agende, kojim se predviđa pojednostavljenje registracije poslovnih subjekata u Federaciji Bosne i Hercegovine, Vlada Federacije Bosne i Hercegovine se opredijelila za uspostavljanje jednošalterskog sistema registracije poslovnih subjekata. S tim u vezi je uspostavljena i inter-resorna radna grupa čiji je mandat analiza stanja, kreiranje i implementacija preporuka za uspostavljanje ovog sistema, uz podršku Britanske ambasade i Grupacije Svjetske banke.

U proteklom periodu je pripremljena i analiza postojećeg stanja u okviru koje su identificirani propisi koje je neophodno mijenjati kako bi se omogućilo uspostavljanje jednošalterskog sistema registracije. Između ostalog, identifikovana je i potreba za doradom pojedinih odredbi Zakona o privrednim društvima u dijelu koji se odnosi na društva s ograničenom odgovornošću. Akcenat se stavlja, između ostalog na poslovno okruženje pri čemu je cilj privlačenje što većeg broja investicija, kako domaćih, tako i stranih, a kojima će se podržati srednjoročni ekonomski rast. Vlada Federacije Bosne i Hercegovine je opredjeljena da nastavi ulagati napore s ciljem pojednostavljenja postupaka i jačanja transparentnosti u ovoj oblasti.

Imajući u vidu potrebu da se postupak upisa poslovnih subjekata u Registar društva ubrza, da se koraci pojednostave, te da se omogući podnošenje zahtjeva za registraciju elektronskim putem, kreiranjem jednošalterskog sistema, predlažu se u ovom zakonu određene izmjene i dopune kako bi se uskladio sa Zakonom o registraciji poslovnih subjekata Federacije Bosne i Hercegovine. Ovako značajne novine u

procesnom zakonu, neminovno su nametnule potrebu izmjena u materijalnom zakonu, kako u praksi ne bi dolazilo do sukoba normi, i eventualnih problema u provedbi odredbi Zakona o privrednim društvima.

### **III – OBRAZLOŽENJE PREDLOŽENIH PRAVNIH RJEŠENJA**

**Član 1.** – Predloženom izmjenom člana 6. zakona predviđena je mogućnost da osnivači privrednih društava u postupku registracije, izjavom potvrde ispunjenost uvjeta za obavljanje djelatnosti utvrđene u priloženim registracionim aktima, a nadležni registarski organ izjavu, po službenoj dužnosti, dostavlja nadležnim općinskim i kantonalnim organima i obavještava ih o početku obavljanja djelatnosti tog društva.

Ovakvom normom, postupak registracije se u značajnijoj mjeri pojednostavljuje i ubrzava, obzirom na činjenicu da je brisana i odredba koja je davala mogućnost da se u slučaju kada zakonom ili drugim propisom nisu propisani uvjeti za dobijanje saglasnosti, dozvole ili drugog akta nadležnog akta, da tada federalna ministarstva, svako u okviru svoje nadležnosti, utvrdi te uslove. Ovakvim predloženim rješenjem se omogućava da poslovni subjekt odmah nakon registracije može početi obavljati djelatnost, pri čemu će nadležni inspekcijski organ, kasnije, u postupku redovnog inspekcijskog nadzora, utvrditi tačnost izjave i ispunjenost zakonom utvrđenih minimalno - tehničkih uvjeta. Međutim, djelatnosti za koje je posebnim materijalnim zakonom koji reguliše tu oblast utvrđeno da društvo može obavljati tu djelatnost samo na osnovu saglasnosti, dozvole ili drugog akta nadležnog organa, u tom slučaju društvo može obavljati djelatnost tek nakon dobijanja dozvole, saglasnosti ili drugog akta nadležnog organa.

**Član 2.** – Predloženom izmjenom člana 60. zakona, izvršeno je usklađivanje teksta ovog zakona sa tekstem Zakona o registraciji poslovnih subjekata u Federaciji Bosne i Hercegovine.

**Član 3.** - Predloženom izmjenom člana 304. mijenja se važeća odredba u prvom stavu na način da se društvo sa ograničenom odgovornošću osniva ugovorom koji zaključuju osnivači, čiji potpisi se ovjeravaju u skladu sa Zakonom o registraciji poslovnih subjekata i propisima kojima se u Federaciji uređuje elektronski potpis i elektronski dokumenat.

**Član 4.** - Predloženom izmjenom člana 305. zakona ugovor o osnivanju društva može potpisati punomoćnik osnivača na osnovu punomoći koja se prilaže uz ugovor, a kojom punomoći je izričito ovlašten za taj posao i na kojoj je potpis osnivača ovjeren u skladu sa odredbama Zakonom o registraciji poslovnih subjekata i propisima kojim se u Federaciji uređuje elektronski potpis i elektronski dokumenat.

**Član 5.** - Predloženom izmjenom člana 347. zakona društvo se obavezuje da kod izmjene osnivačkog kapitala, najkasnije u roku od sedam dana od donošenja odluke, izvijesti registarski organ o promjeni.

**Član 6.** - Uvodi se odredba u Prijelaznim i završnim odredbama, član 372a. koja reguliše način okončavanja već ranije započetih postupaka, na način da ako su prijave podnesene prije stupanja na snagu ovog zakona koje se odnose na osnivanje ili

promjene osnivača, dioničara i člana društva, isključenje člana društva, kao i prijave postupka izbora organa i donošenja opštih akata društava i drugih oblika organizovanja za obavljanje privredne djelatnosti, okončat će se po odredbama propisa koji su bili na snazi u vrijeme podnošenja te prijave registru. “

**Član 7.** - je odredba koja reguliše stupanje na snagu ovog zakona i to narednog dana od dana objavljivanja u „Službenim novinama Federacije BiH“.

#### **IV – FINANSIJSKA SREDSTVA**

Za provođenje ovog zakona nije potrebno obezbijediti dodatna sredstva u Budžetu Federacije Bosne i Hercegovine.

**Odredbe Zakona o privrednim društvima („Službene novine Federacije BiH“, broj 81/15), koje se mijenjaju:**

**Član 6.**

**(Djelatnost)**

- (1) Društvo počinje obavljati svoju djelatnost nakon upisa u registar društava i objavljivanja registracije u skladu sa zakonom kojim se uređuje registracija privrednih društava.
- (2) Djelatnosti za koje je zakonom utvrđeno da se mogu obavljati samo na osnovu saglasnosti, dozvole ili drugog akta nadležnog organa mogu se obavljati nakon dobijanja dozvole, saglasnosti ili drugog akta nadležnog organa.
- (3) Ukoliko zakonom ili drugim propisom nisu utvrđeni uvjeti za dobijanje saglasnosti, dozvole ili drugog akta nadležnog organa iz stava (2) ovog člana, federalna ministarstva će u skladu s ovim zakonom, svako u okviru svoje nadležnosti, utvrditi te uvjete.
- (4) Djelatnosti za koje je posebnim zakonom propisano da se obavljaju u određenom obliku privrednog društva, ne mogu se obavljati u drugom obliku privrednog društva.

**Član 60.**

**(Registar društava)**

- (1) Podaci o društvu utvrđeni ovim zakonom upisuju se u registar društava.
- (2) Registar društava obuhvata registar podataka i registar isprava.
- (3) Upis u registar društava i objavljivanje registracije vrši se u skladu sa Zakonom o registraciji poslovnih subjekata u Federaciji Bosne i Hercegovine.
- (4) Promjene podataka i isprava društava upisuju se u registar društava.

**Član 304.**

**(Osnivački akt)**

- (1) Društvo sa ograničenom odgovornošću osniva se ugovorom u pisanoj formi koji zaključuju osnivači, čiji potpisi se ovjeravaju u skladu sa zakonom.
- (2) Kada društvo sa ograničenom odgovornošću osniva samo jedan osnivač, osnivački akt je odluka o osnivanju.

**Član 305.**

**(Ugovor o osnivanju društva)**

Ugovor iz člana 304. stav (1) ovog zakona može potpisati punomoćnik osnivača na osnovu punomoći koja se prilaže ugovoru, a kojom je punomoćnik izričito ovlašten za taj posao i na kojoj je potpis osnivača ovjeren u skladu sa zakonom.

**Član 347.**

**(Povećanje osnovnog kapitala)**

- (1) Osnovni kapital povećava se na osnovu odluke skupštine društva sa ograničenom odgovornošću, uplatom ili unošenjem novih uloga.
- (2) Članovi društva imaju pravo prvenstva uplate novih uloga u srazmjeri svojih udjela u osnovnom kapitalu u roku od 30 dana od dana donošenja odluke o povećanju osnovnog kapitala, ako osnivačkim aktom ili statutom društva nije drugačije određeno.
- (3) Lice koje pristupa društvu potpisuje izjavu da prihvata sve obaveze i prava utvrđene ugovorom i statutom društva.

(4) Društvo ne može davati zajmove, kredite ili osiguranje za sticanje svojih udjela.

(5) U postupku restrukturiranja ili finansijske konsolidacije društva novi udjeli mogu se sticati i na drugi način, ukoliko je to propisano posebnim zakonom.